

Lectio prima

*Aures surdorum patebunt,
et aperta erit lingua mutorum.*

Lectio libri Isaiae prophetae

35, 4-7 a

Dicite pusillanimis: « Confortamini et nolite timere; ecce Deus vester ultionem adducet retributionis: Deus ipse veniet et salvabit vos ».

Tunc aperiuntur oculi caecorum, et aures surdorum patebunt; tunc saliet sicut cervus claudus, et aperta erit lingua mutorum; quia scissae sunt in deserto aquae, et torrentes in solitudine.

Et quae erat arida erit in stagnum, et sitiens in fontes aquarum. — Verbum Domini.

Psalmus responsorius

Ps 145, 7. 8-9 a. 9 bc-10 (R.: 2 a)

R. Lauda, anima mea, Dominum.

vel Alleluia.

7 Qui custodit veritatem in saeculum,
facit iudicium oppressis,
dat escam esuriéntibus.

Dominus solvit compeditos. R.

8 Dominus illuminat caecos,
Dominus erigit depressos,
Dominus diligit iustos,

9 Dominus custodit advenas. R.

Pupillum et viduam sustentat,
et viam peccatorum disperdit.

10 Regnabit Dominus in saecula,
Deus tuus, Sion,
in generationem et generationem. R.